



UVJETI ZA KORIŠTENJE LICENCE ZA OBAVLJANJE DJELATNOSTI TRGOVINE I SNABDIJEVANJA ELEKTRIČNOM ENERGIJOM NA TERITORIJI BOSNE I HERCEGOVINE

Registracijski broj licence: 05-28-12-177-*/22

Naziv vlasnika licence: Javno preduzeće za komunalne djelatnosti “Komunalno Brčko” d.o.o.,
Brčko Distrikt BiH

1. Opće odredbe
 - 1.1. Ova licenca se izdaje u skladu sa Pravilnikom o licencama (“Službeni glasnik BiH”, broj 63/16), a na osnovu zahtjeva broj 05-28-12-177-1/22 od 27. juna 2022. godine podnietog od JP “Komunalno Brčko” d.o.o., Brčko Distrikt BiH.
 - 1.2. Licenca se izdaje za period od 1. novembra 2022. godine do 31. oktobra 2027. godine.
2. Obavljanje licencirane aktivnosti
 - 2.1. Vlasnik licence je ovlašten da obavlja djelatnosti trgovine i snabdijevanja električnom energijom (licenciranu djelatnost) poštujući odredbe Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), Zakona o električnoj energiji (“Službeni glasnik Brčko Distrikta BiH”, br. 36/04, 28/07, 61/10 i 4/13), kao i odredbe definisane u licenci, te odgovarajuće propise u Federaciji Bosne i Hercegovine i Republici Srpskoj.
 - 2.2. Pravo obavljanja licencirane djelatnosti iz tačke 2.1 dodjeljuje se isključivo vlasniku licence.
 - 2.3. Obaveze definirane u licenci ne umanjuju obaveze vlasnika licence definirane zakonom.
 - 2.4. Licencirana djelatnost iz tačke 2.1. podrazumijeva trgovinu i snabdijevanje kupaca električnom energijom na teritoriju BiH.
 - 2.5. Vlasnik licence ne može prestati obavljati licenciranu djelatnost bez prethodnog odobrenja od DERK-a.
 - 2.6. Vlasnik licence električnu energiju neophodnu za obavljanje licencirane djelatnosti nabavlja u skladu sa zakonom i propisima DERK-a.
3. Obaveze i prava vlasnika licence
 - 3.1. Vlasnik licence je dužan u toku korištenja licence permanentno zadovoljavati opće i specifične kriterije utvrđene Pravilnikom o licencama na osnovu kojih mu je licenca izdata i podnositi DERK-u o tome odgovarajuće dokaze.
 - 3.2. Vlasnik licence je dužan da redovno ili po zahtjevu DERK-a, dostavlja DERK-u finansijske i ostale izvještaje u formi i obimu definiranom ovom licencom ili zahtjevom DERK-a.
 - 3.3. Vlasnik licence je dužan da priprema finansijske izvještaje koji će biti dostupni javnosti za licenciranu djelatnost u skladu sa računovodstvenim standardima koji važe u Bosni i Hercegovini i u skladu sa odredbama koje propiše DERK.

- 3.4. Vlasnik licence je dužan računovodstveno razdvojiti licenciranu djelatnost od drugih djelatnosti.
 - 3.5. Vlasnik licence je dužan da posjeduje sistem osiguranja kvaliteta i obavještava DERK o njegovim promjenama.
 - 3.6. Vlasnik licence je dužan da poštuje Tržišna pravila i Mrežni kodeks.
 - 3.7. Vlasnik licence je dužan da poštuje Opće uvjete za isporuku i snabdijevanje električnom energijom i Distributivna mrežna pravila Brčko Distrikta Bosne i Hercegovine.
 - 3.8. Vlasniku licence nije dozvoljeno da provodi bilo kakve antikonkurencijske aktivnosti, zloupotrebljava tržišnu moć ili vrši manipulacije tržištem električne energije.
 - 3.9. Vlasnik licence je dužan da svoje usluge pruža na fer i nediskriminirajući način.
 - 3.10. Vlasnik licence ima pravo da prisustvuje sastancima tehničkih komisija koje daju komentare tokom pripreme i izmjena Mrežnog kodeksa i Tržišnih pravila. Vlasnik licence ima pravo da bude biran u tehničku komisiju.
 - 3.11. Vlasnik licence je dužan da se pridržava odluka Nezavisnog operatora sistema u Bosni i Hercegovini (NOS BiH) kada se, u skladu sa zakonom i licencom NOS-a BiH, u hitnim okolnostima koje zahtijevaju brzo djelovanje, mijenja Mrežni kodeks ili Tržišna pravila.
 - 3.12. Vlasnik licence je dužan da poštuje mjere koje propiše DERK, Ministarstvo vanjske trgovine i ekonomskih odnosa Bosne i Hercegovine (Ministarstvo) ili nadležni organ Brčko Distrikta BiH u slučaju prirodne katastrofe ili druge situacije sa posljedicama po opću sigurnost.
 - 3.13. Vlasnik licence dužan je poštovati tarife, kao i Pravilnik o tarifnom postupku („Službeni glasnik BiH“, broj 44/05), Metodologiju za određivanje tarifa za snabdijevanje električnom energijom, u okviru javne usluge u Brčko Distriktu Bosne i Hercegovine („Službeni glasnik BiH“, broj 90/14) i pravila o snabdijevanju kupaca električnom energijom.
 - 3.14. Vlasnik licence je dužan da na zahtjev DERK-a, NOS-a BiH, Elektroprijenosa Bosne i Hercegovine i Ministarstva, kao i nadležnih organa Brčko Distrikta BiH, dostavi tražene podatke, dokumente i informacije potrebne za provođenje zakona. Organi kojima su podaci dostavljeni čuvat će povjerljivost svih traženih podataka i informacija koje se smatraju trgovačkom tajnom ili povjerljivim, osim u mjeri u kojoj zakon predviđa da se takvi podaci objave.
 - 3.15. Vlasnik licence je dužan na svojoj internet stranici objaviti sve relevantne informacije i podatke koji se odnose na licenciranu djelatnost, a koje su potrebne korisnicima ili su od javnog interesa.
4. Nadgledanje obavljanja licencirane djelatnosti
 - 4.1. DERK nadgleda obavljanje licencirane djelatnosti.
 - 4.2. DERK nadgleda sve aspekte usklađenosti djelovanja vlasnika licence sa uvjetima licence, kao i svim odredbama relevantnih zakona i propisa DERK-a.
 - 4.3. DERK može pokrenuti hitni postupak u cilju reagiranja na osnovanu sumnju o povredi obaveza iz licence, na vlastitu inicijativu ili kao odgovor na zahtjev bilo kojeg lica.

- 4.4. DERK vrši najavljene i nenajavljene inspekcije objekata i dokumenata vezanih za licencirane aktivnosti. DERK ima pravo pristupa objektima vlasnika licence, ili objektima kojima upravlja vlasnik licence, prostorijama vlasnika licence, njegovoj opremi, dokumentima, poslovnim knjigama i arhivi kako bi izvršio pregled licencirane aktivnosti. Vlasnik licence DERK-u pruža svaki vid pomoći zatražen u toku pregleda.
- 4.5. Vlasnik licence obavještava DERK o svakoj povredi uvjeta za korištenje licence u roku od 7 dana od saznanja vlasnika licence da je došlo do povrede.
5. Dostavljanje podataka i izvještaja
 - 5.1. Vlasnik licence dostavlja izvještaje DERK-u na način definiran licencom, kao i izvještaje po posebnom zahtjevu DERK-a, na način i u formi koju propiše DERK.
 - 5.2. U roku od 90 dana po isteku fiskalne godine, vlasnik licence će dostaviti svoj godišnji izvještaj o poslovanju za tu fiskalnu godinu. Revidiran finansijski izvještaj će se dostaviti u roku od 180 dana po isteku fiskalne godine.
 - 5.3. Vlasnik licence priprema i dostavlja DERK-u mjesečni izvještaj o preuzetoj, isporučenoj i fakturiranoj električnoj energiji, naplaćenim potraživanjima, pokazateljima kvaliteta snabdijevanja, realizaciji plana održavanja i realizaciji plana investicija.
6. Obnova, izmjena, suspenzija ili ukidanje licence
 - 6.1. Vlasnik licence je dužan podnijeti zahtjev za obnovu licence najkasnije 120 dana prije isteka licence.
 - 6.2. Tokom perioda važenja licence, na zahtjev vlasnika licence ili na inicijativu DERK-a, moguće je otvoriti proces redefiniiranja licence kako bi se uskladili uvjeti licence sa značajnijim promjenama u zakonu ili činjeničnim okolnostima.
 - 6.3. Suspenzija ili ukidanje licence se obavlja pod uvjetima, u slučajevima i na način određen Pravilnikom o licencama.
7. Regulatorna naknada
 - 7.1. Vlasnik licence je dužan da u periodu važenja licence plaća regulatornu naknadu u skladu sa odlukama DERK-a.
8. Sankcije
 - 8.1. Ukoliko se vlasnik licence ne pridržava uvjeta iz licence ili zakona, primijenit će se kaznene odredbe predviđene zakonom.
 - 8.2. DERK može da vlasniku licence dostavi administrativno obavještenje o povredi i da ga pozove na administrativno poravnanje povodom povrede licence od vlasnika iste, prije nego što se primijene kaznene odredbe.
 - 8.3. Prije primjene mjere iz tačke 8.2, u slučajevima kada to okolnosti dozvoljavaju, DERK će pismeno opomenuti vlasnika licence i odrediti rokove za otklanjanje nedostataka.
 - 8.4. DERK prilikom sankcioniranja može koristiti mogućnost suspenzije ili ukidanja licence u skladu sa Pravilnikom o licencama.
9. Rješavanje sporova

- 9.1. Rješavanje sporova pokrenutih od trećih lica vezanih za provođenje uvjeta licence se vrši u skladu sa Poslovníkom o radu DERK-a (“Službeni glasnik BiH” broj 2/05) i Pravilnikom o javnim raspravama (“Službeni glasnik BiH” broj 38/05) ili na drugi odgovarajući način koji je u skladu sa pravilima DERK-a.
 - 9.2. Sporovi između vlasnika licence i kupaca električne energije rješavaju se u skladu sa propisima važećim na području djelovanja vlasnika licence.
10. Odredbe o obavještanju
- 10.1. Adresa vlasnika licence koja se koristi u svrhu dostavljanja obavještenja je:
JP “Komunalno Brčko” d.o.o.
Studentska broj 13, Brčko
 - 10.2. Vlasnik licence može promijeniti svoju adresu koja se koristi u svrhu dostavljanja obavještenja, ali o tome mora unaprijed obavijestiti DERK. Za izmjenu adrese koja se koristi u svrhu dostavljanja obavještenja nije potrebno vršiti izmjenu licence.